

NSA’ NGA NJÚ TE PA MFÉÉ KÊT MÚN NYÛTU

NJÚE ME SHÚKÉT

Lo’ te ka kúmshe nga wúme, yúe a njit ne gú púen te ngúet púen nyútu pua pa mfée kêr’ap ngúenengúe sebe, pe na yire mbe map(ureyúe’ne) kú ghét ngam pua sappé ne fúeshe te njú na, lo’ te ka fét kwen pua tâne pa mfée kêt mún nyútu kpa’ nkiére gú ngétne nga pâre yúe a mfiébe

Wupme pa te njú na, pua ka tuo tuo njú mfé ira yúe púen nyútu ntuo pe ne kú shúkét pua kú wúshe te túm túme puô pua ngúe’, shi na mbe pô yi nsa’ me pum yu sha’ múm nyútu na,

Lo’ te ka a nta’ mi pa mféékêt mún nyútu kpa’ mbe yu shi te nsa’ngu mféékêt me shi’ mi a me yétne yi njit mún nyútu me ndîni ne pi’ tu te nsa’kpen pua yit mún te ngu na,

Lo’ te ka a ntá suo nshi’ shâne sun ma fâne túm túm ma,

Lo’ te ka, te mâ kèn, túm túm te nda shut ngu ngu mbône kpa’ mbit nféére pentú yap te map map mféékêt mún nyútu, lo’te wúme pua nga’két mbe mún nyútu, te ngúenengúe pa mféékêt pemba pua pemgbié mbi pit nsa’ ndîshut te yi ndüere tam kut te wume la’ pua yi mféére fuomkét fuomkét mmanjé wume te ndà lône kú ghét ngam ma.

Lo’ te ka gú nsa’ ngu ngu kpa’ nsèn te pamme mbuo pua nda nshùt ngumbône, yi mbe ngum nshin pa mféékêt mún nyútu pua map map kú ghét ngam ma,

Lo’ te ka yi nyéte mbuomshe shire shire pa mféékêt pua pa kú ghékét ngam pe na pô nga ngüre te yi ngüre yire yi gbèt kèn nsebe na,

Puomshe Mbadem mún

nâ tupshe yire yi nsa’ nga njú, ti pa mféékêt mún nyútu, po yúe wupme ndi nshur’úe a nta’mi gú túm túm pua ngu ngu yétne yi ngum pô nshin na, me shi’mi gú púen ne gú pe kpúere púen te la’, yúe pe nshüşü’ yire yi nsa’ ngam me wupme na, pe ne ma’si’ te yu lére puo kúú wupme, a yétne fa pé, lo’te ndi ngam membéte, túm te ngu ngu pua fâne ngu ngu, lo’ te kúmshe pua shétte te ngétne nga mbône mún nsebe ngúe ngúe me rû pa te ngu ngu nda shút puonepuo pua fâne nsié ngu ngu shúe pe nsa’na.

Pum mgbeti 1

Pe nâ mvé gú puen nyútu pô te mbe kú ghét ngam pua ngúenengúe mbe te wúme nsebe pua pa mféékêt. Pen â ntúm te mbe kú rem ngam pua fabshe ngam, a nshi njír’ap ne yi nshâne ngétne nga shap pô te wupme pontâ.

Mgbeti mbète 2

Nshié mún yétne yi ngét kú nwet te gú pa mféékêt pua kú ghét ngam túm te yire yi nsa’ nga njú, shi mshié nsènte me túm, me ngup, me sù, me shùket, me nga nyinyi, me nda ntañ, ké mo’ nshié wupme túm lo’te la’ ké lo’ te fâne púen’e, lo’ te nkap, lo’ te vé ké lo’ te mo’ nshié mbe.

Mo’nké nshié nsènte ntap ndo’ tèr’i mo’ ngâ shi te mgbète ntañ, mgbète kèn ké mgbète fâne túm túm ngu ké sâ ngu múm nyútu, pa yúe yire ngu ké sâ ngu mbe ne shútu na, nshin nsa’ mo’ ngu na, shi pe ne kú ghét ngam ké mbe pô ne pâshe shútu na.

Mgbeti mbète 3

Nshié mún nyútu ghét mfée kêt wume, mfée kêt kú ghét ngam pua mfée kêt tènntúúm wume te mbe mi.

Mgbeti mbète 4

Mo’ nshié mún ntap ndo’ pe’i mkpèn ké te mbe fa’kpèn ne, me nga kê kpèn pua ntèn kpèn ka kpa’ njié kèn te gú mbe map mentèn na.

Mgbeti mbète 5

Mo’ nshié múm nyútu ntap ndo’ pi’ kwete’i ngúe’ menduwan.

Mgbeti mbète 6

Nshié mún ghét mfée kêt wúme ntu nté ni pue nkèn te gú li’ mentèn.

Mgbeti mbète 7

Gú púen kpa’ na mbe pô ngúe ngúe mesù kèn mbi pit ngékét mfée kêt shi nsènte mbe te ka kèn ntúe’she wap ngúenengúe na. Gú yap ghékét ngúenengúe mfée kêt ntúe’she me shi’ yi nkú’ ranami yúe a nte pe nsùene yire nsa’ ngam ma, mo’ nké yétne yi nèn nshié rône yúe a nsüshe rane-mi na.

Mgbeti mbète 8

Nshié mún pua ne mfée kêt yi mfa nwer’i tu gú nda sa’ ngu yúe a yétne yi mfèr’i te map map pa mfée kêr’i túm te mâ kèn ké kèn ngu.

Mgbeti mbète 9

Nshié mún mà njetne’ i yi mbe yu vé te kú tú mo’ mún, ké yi mshüşü’ i, ké yi ntúme’i te ngu.

Mgbeti mbète 10

Nshié mún nyútu ghét mfée kêt, ngúenengúe nsebe, ne ka pe njetne yi nju’ mbie’ne sa’ shi me ndô ngúere te nda sa’ shútu shi nga rane-mi ntúúm ña yùe pe ntuo li sa, tupshe pa mfée kêr’i pua kêr’i na, ké yi ntupshe mgbú sa’ shi yúe a ntuo suo’i ne sa’ na.

Mgbeti mbète 11

Nshié mún’úe pe nsòme’i na, pum na mbe ndi’ pô ngâ gbú sa’, kúka kèn ki’re nguo kwete mgbú sa’ shi te nda sa’, me ndô ngúere, ña yúe loya njétne yi mfèr’i pòkéri na.

Pe ntap ndo’ suo’i sa’ ndun nshié mún, lo’ te ngékét pua shu shi ghet ké shu shi rié, fú’ yié ka a ndi’ pô fubkèn túm te kèn ngu ke’ ken njú mansié. Mo’ nké shi pe mbi’ ndo’ njap nsuo sa’ ndun mún à rét nja’ yúe a pembi té mbe yi mgbète te fú’ fubkén na.

Mgbeti mbète 12

Nshié mún yié ndi’ yúe pe ndo’ mbe mbib’i ne yi lo’ nyî te nga wumeshi yi’she, pa nshut nda’i, li’ shu’i ké lérewa shi, shi núshe ntu nté mi pua ngétne nga shi yi mbòkét. Nshié mún nyútu ghét mfée kêt túshe lo’ puo kén meshi’ yi nkú yúe pe mbe mbib’i ké yi mbe ñúshe’ i ne.

Mgbeti mbète 13

Nshié mún nyútu ghét mfée kêt ghét kú yi nkétne ne yi nsho’ li’ shu’i (nka’shi) te nshié ngu.

Nshié mún nyútu ghét mfée kêt yi ntúm nshié ngu, mbú ngu’i, mbit nkú njétne yi mbùtne ntúúm.

Mgbeti mbète 14

Te ka pe mbe nta’ vé mún na, mbú i ghét mfée kêt yi nta’ li’ kebkebe mbit, nkú kwete li’ kebkebe te shimo’ ngu.

Yire yi mfée kêt ndi’ yu rié te pa vévé yúe mún ghét püü ngüre na, ké te ngétne nga yúe a ndi’ yùni pua nsa’ nga njú mansié na.

Mgbeti mbète 15

Nshié mún nyútu ghét mfée kêt yi mbe ntúmsié ndi la’.

A ndi yétni ne yúe pe nkuot ntúmsié la’ puo mún, ké yúe pe nkuot mféé kêt yi kupshe ntúmsié la’pue’i nà.

Mgbèti mbète 16

Lo’ te lúm li,membâ po memgbié nghétkét mféé kêt yi ndâme mbit njétne yi nsèn ngùet mún, shi tié nto’ne nga túm, nga la’ púen ké nga nyinyi púen ne. Pe ghét kêt na mféé kêt te lam pô ngúenengúe, lo’ te wume lam pua fú’ yíé ka pe òo lam ma.

Kutlam shu na pô te ndi nshut pua pééme pè’ghâ yi ndâme.

Ngúet mún pua nki map mbadem mún lo’ fem nshin mo’nké mbi ghét mféé kêt kwete shi lo’ puo mbadem mún pua nsa’ngu.

Mgbèti mbète 17

Nshié mún, yi’she ké me rü púen ne, ghét mféé kêt ghét kù yi yúm.

Pe mâ njétni yi nvé mún nkuot kù yu’i.

Mgbèti mbète 18

Nshié mún nyütu ghét mféé kêt kú rem ngam, yi, ne nga nyinyi; yire yi ntupshe yi ngét kú kupshe nga nyinyi ké ghét kú ghét nga nyinyi yi’she ké te puomshe me ndôngúere ké me lúemshe, lo’ te yu lére, gù ngéri, fa ngüre ne nyinyi pua ghét gù mgbète ntuot nga nyinyi.

Mgbèti mbète 19

Nshié mún pua ne mféé kêt ghét kú ghét wupme ne yi nshúkére, yire yi ntupshe mféé kêt yi mbe shi yétne yi kwete nkamkét ngam me shi’ gù wupme shi ne mféé kêt yi njétne yi nta’ yi nkwele mbit nsam gù pesa’kúe pua wupme te nshié manjé yi nsâme.

Mgbèti mbète 20

Nshié mún pua ne mféé kêt ghét kú ghét puomshe ne ghét nda nshút puomshe te fùeshe.

Pe fa pe yíé yíri mún i pe mún nda puomshe.

Mgbèti mbète 21

Nshié mún ghét mféé kêt yi nshâre tésù te pesa’kúe npa ngu’i, ké me mún nténe, ké njem púenpúe pe sha’ sh sh na.

Nshié mún ghét mféé kêt yi ngét ntu nté te nsa’ngu’i lo’te ngúenengúe mgbète kèn yi kwete.

Kù ntú pa te ngu pe na yire mbe meyùe’ne (to’she) ne pâwa nsa’ngu. Yire yi kù ntúúm pe nâ yitkéri te nshôshi pô lo’ te shisho’ nzènkét te gù pe rap fù’, òère nshié mún sho’ yi ngúengúe yíé momap, me lúem ké yúe pe nsho ’mo’ nza fééni shi yít mún mbe na.

Mgbèti mbète 22

Nshié mún, me rü lala pa te ngu, ghét mféé kêt yi mbe ne tèn ntúúm wume mb ne mún. A nâ tèt ngâ shi lo’te yi kwete lúúm ntúúm pa mféé kêt shùshù’ mbèt pam, fâne púen te la’ ne nga yi ntuet púen yúe a nkpa’she njit te nga wúme shi na, pua nga lúere púnte ntu nté mi na, lo’ te ma’si’ ngu pua shâne wume ngu ngu, mbe njùe’ne te nga yi nsh she ne nga mbètpam nshié ngu.

Mgbèti mbète 23

Nshié mún nyütu ghét mféé kêt fa’, kù sho’ fa’ shi, lo’te mgbète fa’ yùe a pua yi ghapshe ngúe ngúe ne shire lem túúm pua yi nèn manjé ne nga shu ndem na.

Gù pùen ghétkét mféé kêt ngúenengúe péé te ngúenengúe fa’ shi rane mi mbe.

Nshié ngâ fa’ ghét mféé kêt péé a pe yétni mbit mbe yi shîre ntúúm mbe nshâre’i pua ngür’i te wume yúe a yùne pua wúme ndun mún nyütu na, nzîshîpe yi mbe nsham pa mebú’re te shimo’mmanjé yíéka a ntâne na.

Nshié mún ghét mféé kêt yi njùp nda nshút tùe’she sée mbètpam pua shimo’ pùen mbi pít njétne yi nyi te shire shúe nda shút meshi’ tùe’she sée shi.

Mgbèti mbète 24

Nshié mún ghét mféé kêt gbùne òwet pua pa fône fú’ndem ntamme pékét mgbète fú’ fa’ne ngab ngab’úe a pua yi péé te pe rap fú’ na.

Mgbèti mbète 25

Nshié mún pua ne mféé kêt kwete ntu nté wume njétne a pe yi fú’she njap òwet, nshu mbókér’i ne shi ngúer’i, ntamme meshi’ njùpayù, ma’shùe’, nda nshu, yüre shi, lâne pe fa’ fèt púen te la’, yùe pe ghét shèt nga shi na I ghét mféé kêt puo-ghâme nsa’ngu me yúe i mbe shi fa’ na te ya na, ne kúlúemshe na, te kùú na, te réne na ké te shi mo’ mbe yúe kú wume sié puo’i, lo’te nkamkét ngam’úe a ndi’ te kù ntú’i na.

Nda vé pua pon kpa’she ngét mféé kêt yi nkwele ghâme ne mfère yúe a pua shétti na. Gù pon, mbù pon njem nâ ngum nshin ngúenengúe túshe pa te la’.

Mgbèti mbète 26

Nshié mún nyütu ghét mféé kêt yu lére (kúú wupme). A nâ njit mi kúú wupme pe pô ndem ndem, nkúeshi yétne yi mbe yu lére me njiéshî (pum yu lére) yúe a pua meyùe’ne mbit mbe nkparé’na. Njiéshe yu lére pua pô yitkéri. Yu lére ntu mbue ne yi yi fa’ nâ njit mi pe sâm. mbe njit yúp ndalérewa ngutngüre me nsa’ne ne púen me mfù’ kù ngur’ap.

A nâ njit mi yu lére pe nshééne runkét fú’she ntu nté mún nyütu ne suo kù yi mfa può pa mféé kêt mún nyütu ne mkpara’ fône kú ghét ngam. A nâ njit lúere nju’ngam mûmshe ne sun me fâne ngu ngu ne gù lap lap túm túm ké nga nyinyi, shi lâne tamkut te ngétne nga nda shút ngu ngu mbône, meshi’ shùshù’ fùeshe.

Pa mvévé, te fakú, ghétkét mféé kêt yi nsho’ nga yu lére yùe pe yétne yi mfa ne pon pap na.

Mgbèti mbète 27

Nshié mún ghét mféé kêt yi ngum fúeshî tu wume ntuot mbône mún, yi nsée te pa ghére ntu mbue ne yi ndù’nga wuo nkú sú te yi yu ghére pua ngambókér’i.

Nshié mún ghét mféé kêt yi kwete tùe’she te sée nga ntuot pua mbètpam tùm te yu fù’she yi yi yu ghére, yi yi yu tùete ke yi yi yu ghére ntu mbue yúe i ghét na.

Mgbèti mbète 28

Nshié mún ghét mféé kèr’úe a mbe nsa’ lo’ te fâne púen pua ngu ngu, mgbète kèn kùka pa mféé kêt pua kú ghétkét ngam te yire yi nsa’ nga njú njetne yi mbe wumkéri ntúúm na.

Mgbèti mbète 29

mún nyütu ghét kup kup mfa mfe ndun mbône mún ña yúe a li mî fône pua runkét tamkut te ntu nté mi yétne yi mbe na.

Te rûne pa mféé kèr’i pua lúúm ntúúm te kwete kú ghétkét nga shi, nshié mún nâ mkpem òwor’i te ndút ndút kén meshi’ wúme pua fa può pa mféé kêt pua kú ghét ngam ne montâ a lo’ mfa pô ne ndú nga kúú wupme ngambókét, mgbète nga nsa’ngu ne nshubókét mbadem mún te ngu shùtu.

A mã njétni mi shire pa mfée kêt pua kú ghét ngam lo’ mbe mfa’ne pua gù pa sha’ne gù mgbète nsa’ ngam nda shùt ngu ngu mbône.

Mgbèti mbète 30

Mo’ nshié me yúe’ne lo’ te yire yi nsa’ ngam mã njetni suo kú nshié nsa’ ngu, lap lap pùen ké ndi mún ne, ne yi ngét nshié mfée kêt te ghét pesa’kúe yúe pe fa a nyé’re pa mfée kêt puo kú ghétkét ngam’ùe pe ntanke ntúúm ma.